

Nefndasvið Alþingis
c/o Efnahags- og viðskiptanefnd
Austurstræti 8-10
150 Reykjavík

4. mars 2005

Tilv. 111

BÖ


Efni: Umsögn um frumvarp til laga um ársreikninga, 480. mál, EES-reglur, reikningsskilastaðlar.

Með bréfi dagsettu 10. febrúar sl. var óskað eftir umsögn Kauphallar Íslands hf. um frumvarp til laga um breytingu á lögum um ársreikninga, nr. 144/1994.

Kauphöllin fagnar frumvarpinu og telur það um margt vel útfært. Ástæða er þó til að gaumgæfa betur tvennt. Annars vegar gengur frumvarpið lengra en tilskipun ESB, gerðar eru íþyngjandi kröfur til skráðra fyrirtækja umfram tilskipunina, og hins vegar má draga í efa að tilhögun eftirlitsins sé eins hagkvæm og skýr og best verður kosið. Varðandi fyrri atriðið, þ. e. a. s. íþyngjandi kröfur til skráðra fyrirtækja, verður vart séð að brýna nauðsyn beri til að festa í löggjöf hér á landi ítarlegri kröfur en tilskipun ESB felur í sér. Þessar viðbótarkröfur væri hægt að láta markaðnum eftir að útfæra. Við má bæta að tilhögun frumvarpsins getur veikt samkeppnisstöðu Kauphallarinnar og innlends fjármálamarkaðar í þeim skilningi að torvelda erlendum fyrirtækjum að skrá sig á markað hér á landi. Á þessu þarf að mati Kauphallarinnar að finna lausn sem kemur í veg fyrir að löggjöf um þetta efni leiði af sér lakari samkeppnisstöðu fyrir innlendan hlutabréfamarkað.

Kauphöllin vill ítreka athugasemd sína sem snýr að eftirliti með notkun alþjóðlegra reikningsskilastaðla. Í 56. gr. kemur fram að Fjármálaeftirlitið skuli hafa eftirlit með því að félög, sem heyra undir eftirlit þess og skylt er að beita alþjóðlegum reikningsskilastöðlum eða nýta sér heimild til þess skv. 56. gr. J, beiti stöðlunum á réttan hátt. Ársreikningaskrá skuli hafa eftirlit með öllum öðrum félögum sem skylt er að beita alþjóðlegum reikningsskilastöðlum eða nýta sér heimild til þess. Í frumvarpinu segir um þetta atriði: “Leggja þarf áherslu á að endanlegt fyrirkomulag eftirlitsþáttarins sé hagkvæmt í alla staði.” Kauphöllin tekur eindregið undir þetta sjónarmið og hvetur til þess að ákvæði frumvarpsins um eftirlit verði endurskoðuð með það að leiðarljósi að finna hagkvæmari og skilvirkari skipan en nú er gert ráða fyrir. Kauphöllin telur að fjármögnun eftirlitsins þurfi að liggja fyrir svo ekki verði rennt blint í sjóinn með hver greiði fyrir þjónustuna. Þá þarf að gera kostnaðaráætlun einkum ef nýjum eftirlitsaðila verður bætt við þá sem fyrir eru.


Núverandi skipan felur í sér umtalsvert eftirlit með ársreikningum skráðra félaga. Reikningsskil skráðra fyrirtækja er grunnþáttur í upplýsingagjöf til Kauphallarinnar. Upplýsingagjöf um afkomu og hag skráðra félaga er lykilatriði á virkum markaði og fyrir vikið þarf Kauphöllin að hafa starfsfólk með sérþekkingu á þessu sviði.



Jafnframt er ljóst að innleiðing reglugerðar EB um alþjóðlega reikningsskilastaðla og annarra reglugerða EB um fjármálamarkaðinn gerir kröfu um að Kauphöllin leggi ríkari áherslu á reikningsskil og upplýsingagjöf í tengslum við uppgjör í framtíðinni.

Því telur Kauphöllin að ákvæði frumvarpsins um að ársreikningaskrá og að Fjármálaeftirlitið taki að sér eftirlitshlutverkið muni leiða til tvíverknaðar og þar af leiðandi til óhagræðis og aukins kostnaðar. Kauphöllin hvetur því til þess að tilhögun eftirlits í frumvarpinu verði skoðuð gaumgæfilega með það að markmiði að finna hagkvæma og skynsamlega lausn á eftirlitsþættinum.

Virðingarfyllst,


Þórður Friðjónsson,
forstjóri